



საქართველოს ტექნიკური
უნივერსიტეტი

სამთო-გეოლოგიური

ფაკულტეტი

დ ე ბ უ ლ ე ბ ა

დამტკიცებულია სამთო-გეოლოგიური
ფაკულტეტის საბჭოს მიერ

თბილისი

2007 წელი

ს ა რ ჩ ე ვ ი

დებულების რეგულირების სფერო.....	3
ფაკულტეტის საქმიანობის ძირითადი მიმართულებები	3
ფაკულტეტის სტრუქტურა.....	3
ფაკულტეტის უფლებამოსილება.....	4
ფაკულტეტის ბიუჯეტი	5
ფაკულტეტის მართვის ორგანოები (მმართველი სუბიექტები).....	5
ფაკულტეტის საბჭო.....	5
საბჭოს უფლებამოსილება	6
ფაკულტეტის დეკანი.....	7
დეკანის მოადგილეები.....	8
ფაკულტეტის ხარისხის უზრუნველყოფის სამსახური.....	8
საგანმანათლებლო და სამეცნიერო საქმიანობის განმხორციელებელი ძირითადი ერთეულები.....	9
დეპარტამენტი	9
ზოგადი ცნებები	9
ორგანიზაცია და უფლებამოსილებანი	10
მიმართულება	11
ზოგადი ცნებები	11
სასწავლო-სამეცნიერო კვლევითი ცენტრი.....	13
ფაკულტეტის სადისერტაციო საბჭო.....	13
კომპიუტერული ცენტრი.....	14
ფაკულტეტის დამხმარე სტრუქტურული ერთეულები.....	14
დეკანის აპარატი.....	14
მთავარი სპეციალისტი.....	14
სპეციალისტი.....	15
არქივარიუსი	16
სარედაქციო-საგამომცემლო ჯგუფი.....	16
ბიბლიოთეკა	17
სასწავლო-სამეცნიერო მუზეუმ-ლაბორატორია	17
სასწავლო შახტი-ლაბორატორია.....	17
სტუდენტის უფლება-მოვალეობები და სტუდენტური თვითმართველობა.....	18
სტუდენტი	18
სტუდენტის უფლებები.....	18
სტუდენტის ვალდებულებები:.....	19
სტუდენტური თვითმართველობა.....	20

დებულების რეგულირების სფერო

წინამდებარე დებულება აყალიბებს საჯარო სამართლის იურიდიული პირის - საქართველოს ტექნიკური უნივერსიტეტის შემადგენლობაში მყოფი საგანმანათლებლო და სამეცნიერო საქმიანობის უშუალოდ განმხორციელებელი ძირითადი ადმინისტრაციული ერთეულის - სამთო გეოლოგიური ფაკულტეტის (შემდგომში "ფაკულტეტი") მიზნებსა და ამოცანებს, არეგულირებს ფაკულტეტის საგანმანათლებლო და სამეცნიერო-კვლევითი საქმიანობის ძირითად მიმართულებებს, სტრუქტურას, მართვის ორგანოებსა და პერსონალს, მათი დანიშვნისა და არჩევის წესსა და უფლება მოვალეობებს, მართვის პრინციპებს, ასევე ფაკულტეტის ფუნქციონირებასთან დაკავშირებულ სხვა საკითხებს.

ფაკულტეტის საქმიანობის ძირითადი მიმართულებები

ფაკულტეტის საქმიანობის ძირითადი მიმართულებაა საგანმანათლებლო პროგრამებისა და სამეცნიერო კვლევების განხორციელება სამთო და გეოლოგიურ სფეროში, კერძოდ:

- საბაკალავრო, სამაგისტრო და სადოქტორო აკადემიური პროგრამების განხორციელება;
- პროფესიული უმაღლესი განათლების პროგრამების განხორციელება;
- სამეცნიერო-კვლევითი სამუშაოების წარმართვა;
- საპროექტო, საძიებო და საცდელ-საკონსტრუქტორო საქმიანობა;
- საექსპერტო, დიაგნოსტიკური, საკონსულტაციო და სააუდიტორო საქმიანობა.
- სპეციალისტთა გადამზადება, კვალიფიკაციის ამაღლება

ფაკულტეტის სტრუქტურა

ფაკულტეტის სტრუქტურა განისაზღვრება წინამდებარე დებულებით, რომელსაც ფაკულტეტის საბჭოს წარდგინებით ამტკიცებს წარმომადგენლობითი საბჭო. იგი მოიცავს: ფაკულტეტის მართვის ორგანოებს, საგანმანათლებლო და სამეცნიერო საქმიანობის განმხორციელებელ ძირითად ერთეულებსა და სხვა დამხმარე სტრუქტურულ ერთეულებს.

ფაკულტეტის მართვის ორგანოებია: ფაკულტეტის საბჭო, ფაკულტეტის დეკანი და ფაკულტეტის ხარისხის უზრუნველყოფის სამსახური.

საგანმანათლებლო და სამეცნიერო საქმიანობის განმხორციელებელი ერთეულებია: დეპარტამენტი, პროგრამული მიმართულება და სადისერტაციო საბჭო.

დამხმარე სტრუქტურული ერთეულებია: დეკანის აპარატი, სარედაქციო-საგამომცემლო ჯგუფი, ბიბლიოთეკა (ბიბლიოთეკები), და სხვ. დამხმარე სტრუქტურული ერთეულები (დანართი 1).

ფაკულტეტის შემადგენლობაში სტრუქტურული ქვედანაყოფის სახით შეიძლება შეიქმნას სამეცნიერო-კვლევითი ინსტიტუტები.

ფაკულტეტის სტრუქტურული ქვედანაყოფის სტატუსი და ფუნქცია განისაზღვრება სათანადო დებულებით.

ფაკულტეტი და მისი სტრუქტურული ქვედანაყოფი არ წარმოადგენს იურიდიულ პირს.

ფაკულტეტზე სტრუქტურული ერთეულების გარდა ფუნქციონირებს აგრეთვე სტუდენტური თვითმართველობა.

ფაკულტეტის უფლებამოსილება

საქართველოს კანონის "უმაღლესი განათლების შესახებ", საქართველოს ტექნიკური უნივერსიტეტის წესდების, საკუთარი დებულებისა და მოქმედი კანონმდებლობის საფუძველზე ფაკულტეტი:

- შეიმუშავებს სასწავლო და სამეცნიერო-კვლევითი საქმიანობის ძირითად მიმართულებებს, ადგენს შესაბამის პროგრამებსა და გეგმებს;
- შეიმუშავებს პერსონალის სამსახურში მიღების წესს, რომელსაც აკადემიური საბჭოს წარდგინებით ამტკიცებს წარმომადგენლობითი საბჭო;
- სასწავლო წლის დასაწყისში განსაზღვრავს კოეფიციენტს ერთიანი ეროვნულ გამოცდებისათვის;
- ირჩევს მართვის ორგანოებსა და თანამდებობის პირებს;
- ქმნის სწავლების ხარისხის უზრუნველყოფის სამსახურს;
- საქართველოს კანონმდებლობითა და წესდებით დადგენილი წესით წყვეტს ფაკულტეტის მიერ მოზიდული ფინანსებისა და მის მფლობელობაში არსებული ქონების ფლობასა და სარგებლობასთან დაკავშირებულ საკითხებს;
- ახორციელებს სტუდენტთა მომზადებას განათლებისა და მეცნიერების სამინისტროს მიერ დამტკიცებული ნუსხის ერთ ან რამდენიმე სპეციალობაში და მათთვის შესაბამისი აკადემიური ხარისხის ან/და პროფესიული უმაღლესი განათლების კვალიფიკაციის მინიჭებას;

- ფაკულტეტზე სტუდენტების მიერ საგანმანათლებლო პროგრამის გავლის წესი რეგულირდება შესაბამისი დებულებით, რომელსაც ფაკულტეტის საბჭოს წარდგინებით ამტკიცებს უნივერსიტეტის აკადემიური საბჭო.

ფაკულტეტის ბიუჯეტი

ფაკულტეტის ბიუჯეტს შეადგენს ამ ფაკულტეტის მიერ მოზიდული შემოსავლები საბაკალავრო, სამაგისტრო და სადოქტორო პროგრამებიდან, ასევე ნებისმიერი სხვა შემოსავალი, რომელიც არ არის აკრძალული საქართველოს კანონმდებლობით, უნივერსიტეტის წესდებით და სხვა მარეგულირებელი დოკუმენტებით.

ფაკულტეტს გააჩნია თავისი ქვებანკი.

ფაკულტეტი საქართველოს კანონმდებლობით, საკუთარი დებულებითა და უნივერსიტეტის წესდებით დადგენილი წესით წყვეტს ფაკულტეტის მიერ მოზიდული ფინანსებისა და მის მფლობელობაში არსებული ქონების ფლობასა და სარგებლობასთან დაკავშირებულ საკითხებს.

ფაკულტეტის ბიუჯეტი მუშავდება ფაკულტეტის საბჭოს მიერ და გადაეცემა ადმინისტრაციის ხელმძღვანელს ნაერთ ბიუჯეტში ჩასართავად. თუკი ბიუჯეტის განაწილება არ ეწინააღმდეგება საქართველოს კანონმდებლობას და უნივერსიტეტის საქმიანობის მარეგულირებელ დოკუმენტებს, ადმინისტრაციის ხელმძღვანელი ჩართავს მას ნაერთ ბიუჯეტში და წარუდგენს აკადემიური საბჭოს თანხმობით წარმომადგენლობით საბჭოს დასამტკიცებლად.

ფაკულტეტის ბიუჯეტს ამტკიცებს წარმომადგენლობითი საბჭო. წარმომადგენლობით საბჭოს არა აქვს უფლება ფაკულტეტთან შეთანხმების გარეშე ცვლილება შეიტანოს ფაკულტეტის ბიუჯეტში.

ფაკულტეტის მართვის ორგანოები (მმართველი სუბიექტები)

ფაკულტეტის მართვის ორგანოებია (მმართველი სუბიექტებია): ფაკულტეტის საბჭო, ფაკულტეტის დეკანი და ფაკულტეტის ხარისხის უზრუნველყოფის სამსახური.

ფაკულტეტის საბჭო

ფაკულტეტის წარმომადგენლობითი ორგანოა ფაკულტეტის საბჭო, რომლის შემადგენლობაში შედის ფაკულტეტის აკადემიური პერსონალის ყველა წევრი და სტუდენტთა თვითმმართველობის წარმომადგენლები, ან, საჭიროების შემთხვევაში, - აკადემიური პერსონალისა

და სტუდენტური თვითმართველობის არჩეული წარმომადგენლები. უკანასკნელ შემთხვევაში ფაკულტეტის საბჭოს წევრთა რაოდენობა და არჩევის წესი განისაზღვრება ფაკულტეტის საბჭოს მიერ.

ფაკულტეტის საბჭოში სტუდენტთა თვითმართველობის წარმომადგენელთა რაოდენობა განსაზღვრულია საბჭოს შემადგენლობის 1/14-ით. ფაკულტეტის საბჭოში სტუდენტთა წარმომადგენლების რაოდენობის გაზრდა შესაძლებელია მოხდეს ფაკულტეტის საბჭოს გადაწყვეტილებით.

ფაკულტეტის საბჭო იკრიბება სტუდენტთა თვითმართველობის მიერ ფაკულტეტის საბჭოში წარმომადგენლების (საჭიროების შემთხვევაში აკადემიური პერსონალის წარმომადგენელთა) არჩევიდან არა უგვიანეს 5 დღისა.

ფაკულტეტის საბჭო პირველი შეკრებისთანავე ცნობს თავის უფლებამოსილებას.

საბჭოს უფლებამოსილება

ფაკულტეტის საბჭო:

- განსაზღვრავს და ადმინისტრაციის ხელმძღვანელს წარუდგენს ფაკულტეტის ბიუჯეტს;
- თავისუფალი და თანასწორი არჩევნების საფუძველზე, ფარული კენჭისყრით, სიითი შემადგენლობის უმრავლესობით ირჩევს ფაკულტეტის დეკანს. დეკანის არჩევნები ტარდება მართვის ორგანოების არჩევნების ჩატარების საუნივერსიტეტო დებულებით დადგენილი წესით;
- დეკანის წარდგინებით შეიმუშავებს და უნივერსიტეტის აკადემიურ საბჭოს დასამტკიცებლად წარუდგენს ფაკულტეტის განვითარების სტრატეგიულ გეგმას, სასწავლო და სამეცნიერო-კვლევით პროგრამებს;
- დეკანის წარდგინებით შეიმუშავებს ფაკულტეტის სტრუქტურასა და დებულებას და დასამტკიცებლად წარუდგენს წარმომადგენლობით საბჭოს;
- შეიმუშავებს სადისერტაციო საბჭოს დებულებას და დასამტკიცებლად წარუდგენს აკადემიურ საბჭოს;
- ირჩევს უნივერსიტეტის აკადემიური საბჭოსა და წარმომადგენლობითი საბჭოს წევრებს ფაკულტეტისათვის განსაზღვრული კვოტის ფარგლებში. შესაბამისი არჩევნები ტარდება მართვის ორგანოების არჩევნების ჩატარების საუნივერსიტეტო დებულებით დადგენილი წესით;
- ირჩევს ფაკულტეტის ხარისხის უზრუნველყოფის სამსახურის უფროსს;

- ამტკიცებს ფაკულტეტის ორგანიზაციული და სტრუქტურული ერთეულების ხელმძღვანელებს;
- ახორციელებს "უმაღლესი განათლების შესახებ" საქართველოს კანონითა და საქართველოს კანონმდებლობით მისთვის მინიჭებულ სხვა უფლებამოსილებას.

ფაკულტეტის საბჭო უფლებამოსილია, თუ მას ესწრება საბჭოს წევრთა სიითი შემადგენლობის ნახევარზე მეტი.

გადაწყვეტილება მიიღება დამსწრეთა უბრალო უმრავლესობით, ხოლო არჩევნებისას, ფაკულტეტის სტრუქტურის, ბიუჯეტის განსაზღვრისას და ფაკულტეტისათვის სხვა მნიშვნელოვანი გადაწყვეტილებისას, საბჭოს სიითი შემადგენლობის უმრავლესობით.

ფაკულტეტის დეკანი

ფაკულტეტის საბჭო ფაკულტეტის დეკანს ირჩევს ოთხი წლის ვადით. დეკანის თანამდებობაზე ერთი და იგივე პირი შეიძლება არჩეული იქნეს ზედიზედ მხოლოდ ორჯერ.

უნივერსიტეტის ფაკულტეტის დეკანის თანამდებობაზე კანდიდატთა რეგისტრაციისა არჩევნების ჩატარების წესები განისაზღვრება არჩევნების ჩატარების საუნივერსიტეტო დებულებით.

დეკანად შეიძლება აირჩეს ასოცირებული ან სრული პროფესორი.

ფაკულტეტის დეკანი:

- უზრუნველყოფს ფაკულტეტზე სასწავლო-სამეცნიერო საქმიანობის ეფექტურად მიმდინარეობას;
- ფაკულტეტის საბჭოს განსახილველად წარუდგენს ფაკულტეტის განვითარების გეგმას, სასწავლო და სამეცნიერო-კვლევით პროგრამებს;
- შეიმუშავებს და ფაკულტეტის საბჭოს დასამტკიცებლად წარუდგენს ფაკულტეტის სტრუქტურასა და დებულებას, აგრეთვე სტრუქტურული ერთეულების ხელმძღვანელებს;
- თავისი კომპეტენციის ფარგლებში პასუხისმგებელია წარმომადგენლობითი საბჭოს, აკადემიური საბჭოსა და ფაკულტეტის საბჭოს გადაწყვეტილების შესრულებაზე;
- თავისი კომპეტენციის ფარგლებში გამოსცემს ინდივიდუალურ სამართლებრივ აქტებს;
- თავმჯდომარეობს ფაკულტეტის საბჭოს სხდომებს;
- "უმაღლესი განათლების შესახებ" საქართველოს კანონისა და ამ წესდების შესაბამისად პასუხისმგებელია ფაკულტეტის ბიუჯეტის მიზნობრივ გამოყენებაზე;
- წარმოადგენს ფაკულტეტს მესამე პირებთან ურთიერთობაში;

- ადგენს ფაკულტეტის საქმის წარმოების წესს;
- მისთვის მინიჭებული უფლებამოსილების ფარგლებში დებს ხელშეკრულებებს ფაკულტეტის სახელით;
- ახორციელებს "უმაღლესი განათლების შესახებ" საქართველოს კანონითა და საქართველოს კანონმდებლობით მისთვის მიიჭებულ სხვა უფლებამოსილებას.

დეკანის მოადგილეები

ფაკულტეტის დეკანის მოადგილე არის ადმინისტრაციული თანამდებობის პირი, რომელიც თანამდებობაზე ინიშნება უნივერსიტეტის რექტორის მიერ დეკანის წარდგინების საფუძველზე.

დეკანის მოადგილე სასწავლო დარგში უზრუნველყოფს:

- სასწავლო პროცესის ეფექტურად წარმართვას ბაკალავრიატში, მაგისტრატურასა და დოქტურანტურაში;
- უნივერსიტეტის წესდებით განსაზღვრული სასწავლო საქმიანობის წარმართვას.

დეკანის მოადგილე სამეცნიერო დარგში უზრუნველყოფს:

- სტუდენტთა სამეცნიერო-კვლევით საქმიანობაში ჩართვას;
- სამეცნიერო კონფერენციების მომზადებასა და ჩატარებას;

ფაკულტეტის ხარისხის უზრუნველყოფის სამსახური

ფაკულტეტზე სასწავლო და სამეცნიერო-კვლევითი მუშაობის, აგრეთვე აკადემიური პერსონალის კვალიფიკაციის ამაღლების ხარისხის სისტემატური შეფასების მიზნით იქმნება ხარისხის უზრუნველყოფის სამსახური, რომელიც მოქმედებს ფაკულტეტის დებულების შესაბამისად.

ფაკულტეტის ხარისხის უზრუნველყოფის სამსახური ამყარებს მჭიდრო კავშირს და თანამშრომლობს საზღვარგარეთის ქვეყნების უმაღლესი სასწავლებლების შესაბამის სამსახურებთან ხარისხის კონტროლის გამჭვირვალე კრიტერიუმებისა და მათი უზრუნველყოფის მეთოდოლოგიის ჩამოსაყალიბებლად.

ფაკულტეტის ხარისხის უზრუნველყოფის სამსახურის უფროსი არის ადმინისტრაციული თანამდებობის პირი, რომლის კანდიდატურას ფაკულტეტის საბჭოს წარუდგენს უნივერსიტეტის ხარისხის უზრუნველყოფის სამსახურის ხელმძღვანელი.

ფაკულტეტს შეიძლება წარედგინოს ერთი ან მეტი კანდიდატურა.

ფაკულტეტის საბჭო კანდიდატურის (კანდიდატურების) წარდგენიდან 10 დღის ვადაში სიითი შემადგენლობის უმრავლესობით ირჩევს ფაკულტეტის ხარისხის უზრუნველყოფის სამსახურის ხელმძღვანელს, რაც ფორმდება საბჭოს გადაწყვეტილების ოქმით.

ფაკულტეტის საბჭოს მიერ კანდიდატურის აურჩევლობის შემთხვევაში, უნივერსიტეტის ხარისხის უზრუნველყოფის სამსახურის ხელმძღვანელი ახალ კანდიდატურას წარადგენს 5 დღის ვადაში.

ფაკულტეტის ხარისხის უზრუნველყოფის სამსახურის წევრი შეიძლება იყოს ფაკულტეტის საბჭოს წევრი ნებისმიერი ასოცირებული ან სრული პროფესორი.

ფაკულტეტის ხარისხის უზრუნველყოფის სამსახური:

- უნივერსიტეტის შესაბამის სამსახურთან თანამშრომლობით, ადგენს ფაკულტეტზე სასწავლო და სამეცნიერო მუშაობის შეფასების გამჭვირვალე კრიტერიუმებს;
- ამ კრიტერიუმების საფუძველზე ახდენს სასწავლო და სამეცნიერო პროცესების მონიტორინგს და შეფასებას;
- უზრუნველყოფს ფაკულტეტის თვითშეფასებას აკრედიტაციის პროცესისთვის;
- რეგულარულად აცნობს თავისი მუშაობის შედეგებს ფაკულტეტის საბჭოს.

საგანმანათლებლო და სამეცნიერო საქმიანობის განმხორციელებელი ძირითადი

ერთეულები

დეპარტამენტი

ზოგადი ცნებები

დეპარტამენტი არის ტექნიკური უნივერსიტეტის ფაკულტეტის შემადგენლობაში შემავალი ძირითადი სასწავლო-სამეცნიერო სტრუქტურული ერთეული, რომელშიც ერთიანდება, რამოდენიმე მონათესავე მიმართულება.

სამთო გეოლოგიური ფაკულტეტის სტრუქტურაში შედის ოთხი დეპარტამენტი:

- გეოდეზიის დეპარტამენტი;
- სამთო ტექნოლოგიის დეპარტამენტი;
- გამოყენებითი გეოლოგიის დეპარტამენტი;
- ნავთობისა და გაზის ტექნოლოგიის დეპარტამენტი.

ორგანიზაცია და უფლებამოსილებანი

დეპარტამენტი ექვემდებარება ფაკულტეტის დეკანს.

დეპარტამენტს ხელმძღვანელობს სრული პროფესორის აკადემიურ თანამდებობაზე მყოფი პირი, რომელიც ინიშნება უნივერსიტეტის რექტორის ბრძანებით, ფაკულტეტის დეკანის წარდგინების საფუძველზე.

დეპარტამენტის უფროსის მოვალეობაა:

- უზრუნველყოს სტუდენტთა მომზადება პროფესიული და კვლევაზე ორიენტირებული სწავლებისა და სწავლის ყველა დონეზე მიმართულებების მიხედვით;
- ერთიანი საბაზისო მომზადების პრინციპით კრედიტების ტრანსფერისა და დაგროვების ევროპული სისტემის (ESTS) შესაბამისად ბაკალავრიატის, მაგისტრატურისა და დოქტორანტურის საკვალიფიკაციო დახასიათებების შედგენის, მიმართულებებისათვის კურიკულუმების შემუშავებისა და დანერგვისათვის საჭირო მეთოდური მასალების მომზადების და შესაბამისი კონცეფციების ჩამოყალიბების ხელმძღვანელობა;
- მიმართულებების მიხედვით სასწავლო კურსების საგანმანათლებლო-საკვალიფიკაციო ნორმატიული დოკუმენტების ერთობლივი პაკეტის ფორმატის ჩამოყალიბების კოორდინაცია;
- დეპარტამენტში შემავალ მიმართულებებში ტესტირებისა და გამოცდების ერთიანი წესით ორგანიზების ხელმძღვანელობა, საგამოცდო პროცესის სრულყოფა და კონტროლის ორგანიზაცია;
- მიმართულებების კურსდამთავრებულთა შრომითი დასაქმებისათვის დარგის წამყვან წარმომებთან ურთიერთკავშირის დამყარება;
- სამუშაო გეგმების და მეთოდური მასალების მომზადების კოორდინაცია დეპარტამენტში შემავალი მიმართულებების ეფექტური მუშაობისა და სასწავლო პროცესის ნორმალური წარმართვისათვის, მატერიალურ-ტექნიკური და სასწავლო ბაზების გაუმჯობესებისათვის ზრუნვა;
- დეპარტამენტის შემადგენელ მიმართულებებში სამეცნიერო-კვლევითი სამუშაოების გეგმების შედგენის და გრანტების მოსაპოვებლად სათანადო ფონდების მოძიებისა და შესაბამისი დოკუმენტაციების გაფორმების ხელმძღვანელობა;
- სტუდენტთა, მაგისტრანტთა და დოქტორანტთა სამეცნიერო კონერენციებში, სიმპოზიუმებში და სემინარებში მონაწილეობის ორგანიზაცია;

- მიმართულებების მიხედვით სადოქტორო პროგრამების შემუშავების და სადოქტორო დისერტაციების დაცვისათვის მომზადების კოორდინაცია;
- მიმართულების ხელმძღვანელების პერიოდული ანგარიშების, ინფორმაციების მოსმენა, გაწეული მუშაობის შესახებ.

მიმართულება

ზოგადი ცნებები

მიმართულება ფაკულტეტის დეპარტამენტში შემავალი ორგანიზაციული ერთეულია, რომელიც შედგება აკადემიური პერსონალისაგან და მოიცავს საგანმანათლებლო პროგრამას (კურიკულუმი), სასწავლო კურსს (სილაბუსი), მოდულებს.

საგანმანათლებლო პროგრამა (კურიკულუმი) - არის სასწავლო კურსების ერთობლივობა (მათი მიზნები, მოცულობა და სწავლების შედეგები, სასწავლო პროცესის ორგანიზების თავისებურებები), რომელიც სათანადო აკადემიური ხარისხის ან პროფესიული უმაღლესი განათლების შესაბამისი კვალიფიკაციის მისაღებად არის გამიზნული.

მასში შემავალი საგნების თანამიმდევრული შესწავლა უზრუნველყოფს დარგის სრულფასოვანი სპეციალისტის ჩამოყალიბებას.

სასწავლო კურსის (სილაბუსი) პროგრამის დანიშნულებაა - სასწავლო კურსის მიზნების, შინაარსის, სწავლების შედეგების, მეთოდური უზრუნველყოფის, ცოდნისა და უნარ-ჩვევების შეფასების სისტემის აღწერა.

მოდული - სწავლების დამოუკიდებელი თანამიმდევრული ბლოკი, რომელიც აერთიანებს მონათესავე საგნებს. მოდულში განსაზღვრულია საგანთა ურთიერთკავშირები და თანამიმდევრობა. რამოდენიმე მოდული შეადგენს სასწავლო გეგმას.

მიმართულების კომპეტენციაში შედის სასწავლო, სამეცნიერო, და მეთოდური საქმიანობა, სპეციალისტების, სამეცნიერო და აკადემიური პერსონალის მომზადება და გადამზადება იმ დარგის საგანმანათლებლო პროგრამის მიხედვით, რომელსაც ის ემსახურება.

საქმიანობის სფეროებია მიმართულების აკადემიური პერსონალის ფორმირება შესაბამისი სპეციალისტებით; კურიკულუმებისა და სილაბუსების შედგენა; საგანმანათლებლო პროგრამების უზრუნველყოფა სასწავლო-მეთოდური ლიტერატურით; სასწავლო ლაბორატორიების და სამეცნიერო ცენტრების ნორმალური მუშაობის უზრუნველყოფა; სასწავლო, სადიპლომო და საწარმოო პრაქტიკების ორგანიზაცია; დამთავრებული სამეცნიერო კვლევითი სამუშაოების განხილვა; დამთავრებული სადოქტორო ნაშრომების განხილვა მათთვის რეკომენდაციის მიცემის

მიზნით; გამოცდებისა და ტესტირების ჩატარების ორგანიზება სტუდენტთა ცოდნის შეფასების მიზნით; საგამოცდო ფურცლებისა და უწყისების რეგისტრაცია.

მიმართულებას ხელმძღვანელობს სრული პროფესორი, რომელიც ამტკიცებს მუშაობის საერთო გეგმას, აკადემიური პერსონალის ინდივიდუალურ გეგმებს და სხვა სახის დოკუმენტებს მიმართულებების დონეზე, ანაწილებს აკადემიურ დატვირთვებს და ფუნქციურ მოვალეობებს თანამშრომლებს შორის.

მიმართულების ხელმძღვანელი ინიშნება ამ თანამდებობაზე უნივერსიტეტის რექტორის მიერ ფაკულტეტის დეკანის და დეპარტამენტის უფროსის წარდგინების საფუძველზე.

მიმართულების საქმიანობა უშუალოდ ექვემდებარება შესაბამისი დეპარტამენტის უფროსს.

შესაბამისი მიმართულების აკადემიურ პერსონალს პასუხისმგებლობა ეკისრება მათ მიერ გამოშვებული კურსდამთავრებულების კვალიფიკაციაზე.

ფაკულტეტზე არსებობს 14 მიმართულება:

- საინჟინრო გეოდეზია, მარკშიდერია, ქალაქის კადასტრი;
- სასარგებლო წიაღისეულის საბადოთა დამუშავება; საშახტო და მიწისქვეშა მშენებლობა;
- სასარგებლო წიაღისეულის გამდიდრება;
- სამთო მანქანები და მოწყობილობები;
- სამთო ელექტრომექანიკა;
- სამთო მრეწველობის კომპლექსური ავტომატიზაცია;
- სამთო საქმისა და გეოლოგიის მენეჯმენტი;
- საგანგებო სიტუაციების მართვა და შრომის უსაფრთხოება;
- სასარგებლო წიაღისეულის საბადოების გეოლოგია, ძიება;
- გეოლოგია და პალეონტოლოგია;
- მინერალოგია, პეტროლოგია და გეოქიმია;
- ჰიდროგეოლოგია და საინჟინრო გეოლოგია;
- ნავთობისა და გაზის საბადოების დამუშავება, ნავთობგაზსადენების და ნავთობგაზსაცავების ექსპლუატაცია;
- ჭაბურღილების ბურღვის ტექნიკა და ტექნოლოგია.

სასწავლო-სამეცნიერო-კვლევითი ცენტრი

დანიშნულება და მიზნები

ცენტრი აერთიანებს ფაკულტეტზე არსებულ ყველა სასწავლო-სამეცნიერო-კვლევით ერთეულს:

- გემოლოგიისა და მინერალურ ნივთიერებათა კვლევის დიაგნოსტიკისა და გადამუშავების რესპუბლიკური ცენტრი;
- ძვირფასი ლითონებისა და ძვირფასქვიანი საიუველირო ნაწარმის შემფასებელთა მომზადების კურსები;
- ტიხრული მინანქრისა და საიუველირო ხელოვნების სტუდია;
- ნავთობისა და გაზის მეურნეობის მუშაკთა კვალიფიკაციის ასამაღლებელი კურსები

• **გეოდეზიის კვალიფიკაციის ცენტრი**

ისინი ახორციელებენ:

სასწავლო (საგანმანათლებლო)

სამეცნიერო-კვლევით და საინოვაციო საქმიანობას;

საპროექტო და საცდელ-საკონსტრუქტორო საქმიანობას;

საექსპერტო, დიაგნოსტიკურ და საკონსულტაციო საქმიანობას;

პროფესიულ გადამზადებასა და სრულყოფას;

სახელობო სწავლებისა და კვალიფიკაციის ამაღლებას.

ცენტრში შემავალი ერთეულის საქმიანობა, სტრუქტურა, პერსონალი და თანამდებობების დაკავების წესები რეგულირდება შესაბამისი სტრუქტურული ერთეულის დებულებით.

ფაკულტეტის სადისერტაციო საბჭო

სადისერტაციო საბჭო არის დოქტორის აკადემიური ხარისხის მიმნიჭებელი ორგანო, რომელიც იქმნება ფაკულტეტზე.

სადისერტაციო საბჭოების შედგენის, თავმჯდომარის არჩევის წესსა და კრიტერიუმებს განსაზღვრავს აკადემიური საბჭო ფაკულტეტის საბჭოს წარდგინებით დამტკიცებული დებულების შესაბამისად. სადისერტაციო საბჭო შედგება დოქტორის აკადემიური ხარისხის მქონე სრული ან ასოცირებული პროფესორებისაგან.

სადისერტაციო საბჭოს დებულებით შეიძლება განისაზღვროს ფაკულტეტის სადისერტაციო საბჭოში დოქტორის აკადემიური ხარისხის მქონე პირის მოწვევის წესი და პირობები.

სადისერტაციო საბჭო მოქმედებს აკადემიური საბჭოს მიერ ფაკულტეტის საბჭოს წარდგინებით დამტკიცებული დებულების შესაბამისად და დოქტორის ხარისხს ანიჭებს მეცნიერების იმ დარგებში, რომლებიც განსაზღვრულია ამავე დებულებით.

კომპიუტერული ცენტრი

დანიშნულება და მიზანი

ფაკულტეტის კომპიუტერული ცენტრი წარმოადგენს ფაკულტეტის კომპიუტერული ტექნიკის ძირითად ბაზას.

ცენტრი აწარმოებს ფაკულტეტზე არსებული კომპიუტერული ტექნიკის აღრიცხვას და უზრუნველყოფს მათ გამართულობას შესაძლებლობის ფარგლებში;

ცენტრი უზრუნველყოფს ფაკულტეტზე არსებული კომპიუტერების საქართველოს ტექნიკური უნივერსიტეტის ინტერნეტის ქსელში ჩართვას;

ცენტრი მჭიდროდ თანამშრომლობს ფაკულტეტის სამეცნიერო კვლევით ცენტრთან და უზრუნველყოფს მეცნიერ-თანამშრომლების მიერ კომპიუტერული ტექნიკითა და ინტერნეტით სარგებლობას, იგი უზრუნველყოფს აგრეთვე სამეცნიერო ცენტრის მიერ გადმოცემული სიმულაციური პროგრამების მუშაობას კომპიუტერებზე;

ცენტრი კომპიუტერული ცოდნის ასამაღლებლად აწყოფს კურსებს როგორც სტუდენტთათვის და ფაკულტეტის თანამშრომელთათვის ასევე ნებისმიერი სხვა მსურველისათვის, ამ კურსების წარმატებით დამთავრების შემთხვევაში ცენტრი გასცემს შესაბამის დიპლომს (სერთიფიკატს).

ფაკულტეტის დამხმარე სტრუქტურული ერთეულები

დეკანის აპარატი

დეკანის აპარატი შედგება დამხმარე პერსონალისგან: მთავარი სპეციალისტი, სპეციალისტები და არქივარიუსი.

მთავარი სპეციალისტი

მთავარ სპეციალისტს ევალება:

- სათანადო შინაარსის ბრძანებების გაფორმება;
- სათანადო სტატიკური მონაცემების შედგენა;

- დამამთავრებელი კურსებისათვის: დიპლომის ასლისა და დამთავრების შესახებ ბრძანების პროექტის მომზადება;
- თეორიული კურსის დასრულების შემდეგ, ჯგუფების მიხედვით, შემაჯამებელი დოკუმენტების შედგენა;
- დიპლომის დანართის შედგენა;
- საფაკულტეტო ბრძანებების მომზადება;
- შემაჯამებელი დოკუმენტის საფუძველზე, რომელსაც მოამზადებს პროგრამული უზრუნველყოფის სამსახური, დიპლომების კატეგორიების განსაზღვრა;
- დამამთავრებელი კურსის სტუდენტებისათვის დიპლომის ასლებისა და დამთავრების შესახებ ბრძანების პროექტის მომზადება და გასაფორმებლად წარდგენა არქივში;
- საატესტაციო კომისიის ოქმების წარმოება.

სპეციალისტი

სპეციალისტს ევალება:

- სტუდენტების პირადი საქმეების წარმოება (ჩარიცხვის ბრძანებიდან დაწყებული, ნებისმიერი ბრძანების ამონაწერის შეტანა პირად საქმეში); სტუდენტების ჯგუფებად დაყოფა;
- სტუდენტთა შემადგენლობის შესახებ ყველა შემოსული ბრძანების შინაარსის შეტანა: პროგრამული უზრუნველყოფის ბაზაში; კონტიგენტის ჟურნალში; ალფაბეტურ წიგნში; სასწავლო პასპორტში; მოძრაობის ჟურნალში;
- შესაბამისი ბრძანების ამონაწერის შეტანა პირად საქმეში; ჯგუფის შეცვლის შემთხვევაში პირადი საქმის გადატანა ბრძანებაში მითითებულ ჯგუფში, (გარიცხვის შემთხვევაში პირადი საქმე რჩება იმავე ჯგუფში საიდანაც მოხდა სტუდენტის გარიცხვა);
- სტუდენტთა ატესტატების ჩაბარება არქივში;
- სტუდენტთა პირადი საქმეებიდან სრული მონაცემების ამოკრეფა და მომზადება ელექტრონულ ბაზაში შესატანად, რათა მოხდეს სტუდენტის ნებისმიერი მოთხოვნის დაკმაყოფილება კომპიუტერის საშუალებით;
- ვაჟ სტუდენტთა ფორმა "T-2"-ის ამობეჭდვა და სამხედრო-სამობილიზაციო განყოფილებაში წარდგენა;
- ელექტრონულ ბაზებში სტუდენტების მონაცემების შეტანა: გვარი, სახელი, მამის სახელი, დაბადების წელი, ჩაწერის რაიონი, მისამართი, პასპორტის მონაცემები, მშობლების

ვინაობა, რომელი სკოლა დაამთავრა. ჩამონათვალი მონაცემებიდან სტუდენტის საძიებო კომპიუტერული პროგრამის შექმნა;

- საძიებო სისტემიდან ცნობების გაცემა: ფორმა-26; T-2 და მათი რეგისტრაცია. საძიებო სისტემიდან უნდა იბეჭდებოდეს:
- სასწავლო გეგმა კურსების მიხედვით შესაბამისი სასწავლო წლისათვის;
- ჯგუფის საგამოცდო (ან რეიტინგის) უწყისები;
- ინდივიდუალური საგამოცდო ფურცლები;
- სიები ჯგუფების მიხედვით;
- სიები არჩეული საგნის მიხედვით;
- სასწავლო პასპორტი;
- სტუდენტის სასწავლო ბარათი;
- სისტემა უნდა განსაზღვრავდეს სტუდენტის საკურსო რეიტინგს და ბეჭდავდეს საჭიროებისამებრ ჯგუფების ან ქულების მიხედვით;
- შეფასების შეტანა უწყისებიდან და ინდივიდუალური ფურცლებიდან.

არქივარიუსი

არქივარიუსს ევალება:

- ძველი არქივის (სტუდენტის მიერ უნივერსიტეტის დამთავრებიდან 5-10 წლის შემდეგ) მოხერხებულად და საიმედოდ მოხმარებისათვის დოკუმენტების წარმოება;
- უნივერსიტეტის ზოგადი ბრძანებების რეგისტრირება (მეთოდური, ადმინისტრაციული და სხვა);
- არქივთან დაკავშირებული ყველა დოკუმენტის გაცემა;
- პირადი საქმეების აკინძვა და ჩაბარება ცენტრალურ არქივში;
- საფაკულტეტო ბრძანებებისა და სხვა ნებისმიერი დოკუმენტაციის წარმოება (სამობილიზაციო, სტატისტიკის, სასტიპენდიო და სხვა განყოფილებებში).

სარედაქციო-საგამომცემლო ჯგუფი

სარედაქციო-საგამომცემლო ჯგუფის მუშაობის წესსა და კრიტერიუმებს განსაზღვრავს საქართველოს ტექნიკური უნივერსიტეტის სასწავლო და სამეცნიერო ლიტერატურის სარედაქციო-საგამომცემლო საბჭოს დებულება.

ბიბლიოთეკა

ბიბლიოთეკა წარმოადგენს სასწავლო-სამეცნიერო-კვლევით ერთეულს, რომელიც თავის საქმიანობას წარმართავს ფაკულტეტის წესდებისა და საკუთარი დებულების შესაბამისად.

ბიბლიოთეკა წარმოადგენს სინფორმაციო-სასწავლო და სამეცნიერო ცენტრს, რომელიც უზრუნველყოფს სტუდენტთა და პროფესორ-მასწავლებელთა მომსახურებას.

ბიბლიოთეკა წარმართავს სამეცნიერო-ბიბლიოგრაფიულ საქმიანობას.

ბიბლიოთეკის საქმიანობა განისაზღვრება წლიური გეგმით.

ბიბლიოთეკა უზრუნველყოფს წიგნადი და პერიოდულ გამოცემათა შეძენას, მათ აღრიცხვას, მოვლა-შენახვასა და გამოყენებას.

სასწავლო-სამეცნიერო მუზეუმ-ლაბორატორია

დანიშნულება და მიზნები:

ეს მუზეუმ-ლაბორატორიები არსებობს პოლიტექნიკური ინსტიტუტის ჩამოყალიბების დღიდან და ემსახურება სამივე გეოლოგიურ მიმართულებას:

- სასარგებლო წიაღისეული საბადოების გეოლოგია და ძებნა-ძიების მიმართულება – წიაღისეული საბადოების მუზეუმ-ლაბორატორია;
- გეოლოგიისა და პალეონტოლოგიის – გეოლოგია-პალეონტოლოგიის მუზეუმ-ლაბორატორია;
- მინერალოგიის, პეტროლოგიის და გეოქიმიის – მინერალოგია-პეტროგრაფიის მუზეუმ-ლაბორატორია.

სასწავლო საქმიანობა:

- საველე სასწავლო ექსპედიციები, სამუზეუმო ექსპონატების მოგროვებით;
- ლაბორატორიული სამუშაოები პალეონამარხების ტიპების, კლასების, ქვეკლასების შესასწავლად; მინერალების და ქანების გაცნობა-დახასიათებისათვის; მსოფლიოს უნიკალური საბადოების და საქართველოს თითქმის ყველა საბადოსა და მადანგამოვლინების სრული გეოლოგიური ჭრილების შესასწავლად.

სამეცნიერო საქმიანობა:

- საქართველოს ჯერ კიდევ ბოლომდე შეუსწავლელი და აუთვისებელი საბადოების თავისებურებების კვლევა და მათი პარალელური ცნობილ საბადოებთან;

- ცალკეული სართულების ფაუნის მოგროვება პრეპარაცია და შესწავლა, საქართველოს მუზო-კაინოზოური ნალექების ბიოსტრატиграფიული დანაწილება;
- სამეცნიერო კონფერენციების, სემინარების და ღია კარის დღის ორგანიზება.

შემეცნებითი, სარეკლამო და კომერციული საქმიანობა:

- საქართველოს ოქროს, სპილენძის, პოლიმეტალების, სამშენებლო, მოსაპირკეთებელი და სანახელო ქვების საბადოების და გამოვლინებების პრეზენტაცია და პოპულარიზაცია;
- კავკასიის და მოსაზღვრე რეგიონების ფაუნისტური დათარიღებისათვის აუცილებელი ნიმუშების გაცნობა, სიცოცხლის ჩასახვისა და განვითარების ისტორიის შესწავლა;
- ექსპონანტების (კოლექციების) გამოფენა-გაყიდვის ორგანიზება.

ცალკეული მუზეუმის საქმიანობა, სტრუქტურა, პერსონალი და თანამდებობის დაკავების წესები, რეგულირდება შესაბამისი სტრუქტურული ერთეულის დებულებით.

სასწავლო შახტი-ლაბორატორია

დანიშნულება და მიზნები:

სასწავლო საქმიანობა;

ბაკალავრთა, მაგისტრანტთა და დოქტორანტთა სასწავლო კურსების პრაქტიკის უზრუნველყოფა;

სამთო საწარმოებში მომუშავე ახალგაზრდა სპეციალისტების კვალიფიკაციის ამაღლება;

სამეცნიერო კვლევითი საქმიანობა;

შახტი-ლაბორატორიის საქმიანობა, სტრუქტურა, პერსონალი და თანამდებობის დაკავების წესი რეგულირდება შესაბამისი სტრუქტურული ერთეულის დებულებით.

სტუდენტის უფლება-მოვალეობები და სტუდენტური თვითმართველობა

სტუდენტი

სტუდენტის უფლებები

სტუდენტს უფლება აქვს:

- მიიღოს ხარისხიანი განათლება;
- მონაწილეობა მიიღოს მეცნიერულ კვლევებში;
- ამ დებულებით, შინაგანაწესითა და სხვა დებულებებით დადგენილი წესით თანაბარ პირობებში ისარგებლოს ფაკულტეტის მატერიალურ-ტექნიკური, საბიბლიოთეკო, საინფორმაციო და სხვა საშუალებებით;
- მიიღოს ამომწურავი ინფორმაცია ფაკულტეტის საქმიანობის, მათ შორის, საფინანსო და ეკონომიკური საქმიანობის შესახებ;
- აირჩიოს წარმომადგენელი და არჩეული იქნეს სტუდენტური თვითმართველობის, ფაკულტეტისა და უნივერსიტეტის მართვის წარმომადგენლობით ორგანოებში, უმაღლესი განათლების კანონის და ამ წესდების შესაბამისად;
- თავისუფლად დააფუძვნოს ან/და გაერთიანდეს სტუდენტურ ორგანიზაციებში თავისი ინტერესების შესაბამისად;
- თავისუფლად გამოხატოს საკუთარი აზრი და დასაბუთებული უარი თქვას იმ იდეათა გაზიარებაზე, რომელსაც სთავაზობენ სასწავლო პროცესის მიმდინარეობისას;
- საქართველოს კანონმდებლობითა და მიმღები უმაღლესი საგანმანათლებლო დაწესებულების წესდებით განსაზღვრული წესით სწავლების მეორე წლიდან გადავიდეს სხვა უმაღლეს საგანმანათლებლო დაწესებულებაში და მოახდინოს მისთვის გამოყოფილი სახელმწიფო დაფინანსების ამ დაწესებულებაში გადატანა;
- მიიღოს სტიპენდია, ფინანსური ან მატერიალური დახმარება, სხვა სახის შეღავათები;
- აირჩიოს სასწავლო პროგრამა;
- მონაწილეობა მიიღოს ინდივიდუალური სასწავლო პროგრამის შემუშავებაში;
- პერიოდულად მონაწილეობა მიიღოს აკადემიური პერსონალის საქმიანობის შეფასების პროცესში;
- შეიძლება იმყოფებოდეს სწავლების ინდივიდუალურ გრაფიკზე;
- საჭიროებისამებრ აიღოს აკადემიური შვებულება;
- შეზღუდული შესაძლებლობების მქონე სტუდენტებმა სრულყოფილი განათლების აუცილებელი პირობების შესაქმნელად მიიღონ სხვადასხვა სახის შეღავათები;

- განახორციელოს ამ წესდებით და საქართველოს კანონმდებლობით მისთვის მინიჭებული სხვა უფლებამოსილებანი.

დოქტორანტი შეიძლება არჩეული იქნეს ასისტენტ-პროფესორის თანამდებობაზე. მართვის ორგანოების არჩევნებში იგი მონაწილეობს როგორც სტუდენტი.

სტუდენტის მიერ აკადემიური პერსონალის თანდასწრებით გამოთქმული პირადი ინფორმაცია, ასევე ინფორმაცია საკუთარი შეხედულებების, რწმენისა და პოლიტიკური მრწამსის შესახებ, რომელიც ამ უკანასკნელისთვის ცნობილი გახდა სასწავლო პროცესის მიმდინარეობისას კონფიდენციალურია, გარდა იმ შემთხვევებისა, თუ არსებობს სტუდენტის ნებართვა, ან ადმინისტრაციის კანონიერი ინტერესი დაიცვას სხვისი უსაფრთხოება.

ადმინისტრაციის მხრიდან დაუშვებელია საკუთარი უფლებამოსილების და მატერიალურ-ტექნიკური ბაზის იმგვარი გამოყენება, რამაც შეიძლება შექმნას ცენზურის დაწესების საფრთხე ან შეზღუდოს გამოხატვის თავისუფლება.

სტუდენტთა ქცევის, დისციპლინური დევნის წესები განსაზღვრულია უნივერსიტეტის ეთიკის კოდექსში.

სტუდენტი უფლებამოსილია სასამართლოში გასაჩივროს მის მიმართ მიღებული გადაწყვეტილება.

სტუდენტის სტატუსი წყდება შესაბამისი საგანმაათლებლო პროგრამის დასრულებისას ან უნივერსიტეტის ეთიკის კოდექსით გათვალისწინებულ შემთხვევებში.

სტუდენტის ვალდებულებები:

სტუდენტი ვალდებულია:

- ისწავლოს უნივერსიტეტის მიერ დადგენილი პროგრამის მიხედვით ყველა ის საგანი, რომელიც საკუთარი სურვილით აირჩია და რომლის სწავლაც სავალდებულოა;
- დაიცვას უნივერსიტეტის წესდება, ფაკულტეტის დებულება, შინაგანაწესი, ეთიკის კოდექსი.
- ხელშეკრულების არსებობის შემთხვევაში შეასრულოს ამ ხელშეკრულებით ნაკისრი ვალდებულებები.
- გაუფრთხილდეს უნივერსიტეტის (ფაკულტეტის) მატერიალურ-ტექნიკურ ბაზას.

სტუდენტური თვითმართველობა

ფაკულტეტის სტუდენტური თვითმართველობა წარმოადგენს საქართველოს უმაღლესი განათლების შესახებ კანონის შესაბამისად შექმნილ ფაკულტეტის სტუდენტთა წარმომადგენლობით ორგანოს, რომელიც საქმიანობას წარმართავს უმაღლესი განათლების შესახებ კანონის და თავისი დებულების მიხედვით.

სტუდენტთა თვითმართველობა არჩევნების ორგანიზება-ჩატარებას განსაზღვრავს თავისი დებულებით.

სტუდენტური თვითმართველობა თავისი დებულების შესაბამისად:

- უზრუნველყოფს სტუდენტთა მონაწილეობას ფაკულტეტის მართვაში;
- ხელს უწყობს სტუდენტთა უფლებების დაცვას;
- ირჩევს წარმომადგენლებს ფაკულტეტის საბჭოში;
- ხელს უწყობს სტუდენტთა თავისუფალი დროის ნაყოფიერად გამოყენებას;
- შეიმუშავებს წანადადებებს ფაკულტეტის ან უნივერსიტეტის მართვის სისტემების და სწავლების ხარისხის გასაუმჯობესებლად, რომელსაც წარუდგენს ფაკულტეტის საბჭოს, წარმომადგენლობით საბჭოს, აკადემიურ საბჭოს;
- საჭიროებისამებრ უფლებამოსილია მიიღოს ამომწურავი ინფორმაცია ფაკულტეტის საქმიანობის, მათ შორის საფინანსო და ეკონომიკური საქმიანობის შესახებ;
- საჭიროებისამებრ უფლებამოსილია მიიღოს მონაწილეობა აკადემიური და ადმინისტრაციული პერსონალის მუშაობის შეფასებაში;
- ნიშნავს წევრებს ფაკულტეტის საარჩევნო კომისიებში;
- ნიშნავს წევრებს ფაკულტეტზე არსებული მუდმივ თუ დროებით კომისიებში;
- იღებს საბაზო დაფინანსებას უნივერსიტეტის ბიუჯეტიდან;
- კოორდინირებულად მუშაობს უნივერსიტეტში არსებულ სტუდენტურ ორგანიზაციებთან, კლუბებთან, წარმომადგენლობითი საბჭოს წევრ სტუდენტებთან;
- ადმინისტრაციას მიმართავს შუამდგომლობით სტიპენდიების დანიშვნის, შეღავათების გაწევისა და ინდივიდუალური გრაფიკის დანიშვნის შესახებ;
- განახორციელებს დებულებით გათვალისწინებულ სხვა უფლებამოსილებას.

ფაკულტეტის ადმინისტრაციას უფლება არ აქვს ჩაერიოს სტუდენტური თვითმართველობის საქმიანობაში.

სამთო-გეოლოგიური ფაკულტეტის სტრუქტურა

